

# INUIT ATAQATIGIIT

## Inatsisartuni



UPA 2019/11  
23. maj 2019  
Stine Egede

### **2018-mut Nunatta Karsiata naatsorsuutaasa akuersissutigineqarnissaannik siunnersuut**

(Aningaasaqarnermut Nunanilu Avannarlerni suleqatigiinnermut Naalackersuisoq)

Inuiaqatigiittut tamatta aningaasaqarnitsinnut naatsorsuutit 2018-moortut ullumikkut siullermeerutaasumik oqallisigaavut.

2018-mi Ingerlatsinermit, Sanaartornermit Taarsigassarsiaritanullu, IST-mut, 115 mio. kr-nik sinneqartooruteqarpugut, ukiup siuliani 204 mio-llutik, Ingerlatsinernullu Sanaartornernullu, IS-mut, 133 mio. kr.-nik sinneqartooruteqarluta, ukiup siuliani 230 miousimallutik.

Assigiinngitsunut suunerinut agguataarlugit isigigaanni 2018-imi ingerlatsinermi 90 mio kr-nik sinneqartoortoqarpoq, 2017-imut sanilliullugit 171 mio-nik annikinnerullutik. Tamnalu assigiinngitsunik pissuteqarpoq.

Namminersornerusut isertitaat 2018-imi 280 mio-nik qaffariarsimapput. Raajanit, aalisakkanillu isertitat 154 mionik amerleriarsimammata. Naalagaaffiup tapiissutai akit qaffakkiartorneranut nalimmassaaneq aallaavigalugu 101 mio-nik alleriarsimapput, kiisalu nunamut tamarmut akileraarutitigut isertitat 64 mio-inik annertuseriarsimapput.

Isertitaq qaffariarsimanagerat Inuit Ataqatigiinni iluarisimaarparput.

Ulluinnarni ingerlatsinermit aningaasartuutittaaq 429 mio-nik annertuseriarsimapput. Ilaatigut patsisaalluni 2018-imi sanaartornermit tunngasut ilaannik kommunimut tapiissutit 198-mio nik qaffariarsimammata. Kiisalu annaasanik nalikillilineq Nuna Minerals A/S imik piginneqataassutit 2018-imi 88 mio-inik annertussuseqarsimammata, taamaakkaluartorli tamanna IST-imi inaarutaasumik angusanut allannguinngilaq.

Nunatta karsiata aningaasaatai tigorianaat 454 mio-kr.iupput, taakkualu 46 mio-nik qaffariarsimapput. Pappiaqqanittaaq nalilinnik uninngasuutit 490 mio-nik qaffariarsimapput.

Kissaatigaarput Naalackersuisut ersarissaatigissagaat taakkua suliassanut allanut pituttoqqareernersut.

Inuit Ataqatigiinni	kaammattuutigeqqissavarput	imartatta	kisimi
isumalluutigineqannginnissaanik	suliniartuarnissarput.	Nunami	suliffiit
amerlisartuartaqarpagut,	sulisinnaasunngorsaanerlu		pimoorullugu
inerisartuartaqarparput.	Sulineq kajungernartuusoq		kinguaatsinnut
takutittuartaqarparput.			

Taamannak oqariarluta, qivianngitsoorusunngilarput allaffissornikkut aningaasartuutit qaffakkiartuinnarneri, kiisalu nunatta avataanut suliakkiinerit annertuneruartuinnarneri.

Aningaasartuutit taama ittut nunatta iluani sulitinnerusarutsigit, tamanut iluaqutaanerunissaat angusinnaagaluarparput.

Eqqaanngitsoorsinnaangilarputtaaq pisortanut akiitsut amerligaluttuinnartut eqqarsaatigeqqittariaqaleripput, qanoq allatut iliuuseqarnikkut annikilliartortinneqarsinnaaneri.

Taama oqaaseqarluta siunnersuutip kukkunersuinermut ataatsimiititaliami sukumiisumik suliarineqarnissaanut innersuupparput.